

# Carta Cha Cu Uvi Cha Tyaa Ra Apóstol Juan

---

**Nu catyí ra Juan vatyí cuñí xaan  
ra chí ñu yihí cuenda Nyoo**

<sup>1</sup>Nyoo nacachi ra chuun, yoho Hermana. Ta yuhu cha cuví ra chahnu vehe ñuhu, sacuhín tutu ihya chuun ta chí tandíhi sehung. Ta cuñí xain chí ndo chihin cha ñíi ñíi. Ta ñíma yuhu ri cuñí chí ndo soco tandíhi ca ñu cha nacotó cha ndicha ñandíhi. <sup>2</sup>Cuñí chí ndo cha cuenda cha ndicha cha ñohó chichi añíma yo. Ta tyicuan ri maa cunyaa cha ndicha cuan chihin yo. <sup>3</sup>Sutu yo Nyoo ta Sutú Mañí yo Jesucristo Sehe Nyoo na nasoco ra chí ndo ta na nyehe ndahví ra chí ndo. Ta na coo cha taxi ri añíma ndo, chihin cha ndicha, vatyí cuñí xaan ra chí ndo.

<sup>4</sup>Síi xaan cuñí cha chité tuhun suhva sehung ta nyehí vatyí iyó ñu tari cuhva catyí cha ndicha, tari cuhva catyí Sutú yo Nyoo tyi sacuvi yo. <sup>5</sup>Ta vityin, Hermana, chacú ndahví nuun, na cuñí yo chí noo noo tahan yo. Ican ihya cuví cha tyaí nu tutu ihya. Ta ñíma noo tuhun chaa cha chahá Nyoo chí yo cha vityin ri cuví cha cuñí yo chí noo noo tahan yo. Soco ican ihya

cuví tuhun cha catyí Nyoo chí yo nyata quívi xihna ri. <sup>6</sup>Ta cha cuñí yo chí ra, ican cuví cha sacuví yo tandíhi cha catyí ra chí yo. Ican ihya cuví cha catyí Nyoo tyi sacuvi yo. Ta nyoho, chíñí ndo tuhun ihya nya quívi xihna ri. Na coo ndo chihin cha cuñí ndo chí Nyoo ta chí ñáyívi.

**Nu catyí ra Juan vatyí saha  
cuenda yo chí yo chihin ñu  
chicá noo sandaví ñaha**

<sup>7</sup>Catyí chuun tyehe caa vatyí cuaha xaan ra casandaví ñaha cachicá noo ra nicahnu síqui ñuhu ñáyívi. Cacatyí ra vatyí ña ndicha cha quichi cacu ra Jesucristo chihin coño ñuhu ñáyívi ihya. Ra cacatyí tyicuan caa, sandaví ñaha ra chí ñáyívi. Ta cuví ra noo ra xaan ñíi chí ra Cristo. <sup>8</sup>Yucuan chaha, saha ndo cuenda chí ndo chihin tuhun cha sañahá ra coto sacunaa ndo cha vaha cha sacuví ndo, ta coto ma ñíhi ca ndo tandíhi cha cuacuhva Nyoo chí ndo.

<sup>9</sup>Yóó ñu cha ña ndoó vaha chihin cha sañahá ra Cristo chí yo ta sañahá ñu inga tuhun, yori Nyoo nyaá chihin ñu cuan. Soco ñu ndoó vaha ta

quichahá tuhun cha sañahá ra Cristo, nyaá Sutu yo Nyoo ta ra Jesucristo Sehe ra chihin ñu cuan. <sup>10</sup>Tatu chaa noo ra vehe ndo, cua nyehe ra nu nyicú ndo ta cuñí ra sañaha ra tuhun cha ña sañaha ra Jesucristo, ma cuhva ndo vehe ndo cunyaa ra, ni ma tyinyee ndo chi ra. <sup>11</sup>Vatyí tari quiví cha ñin ri cha ña vaha sacuví yo chihin ra tatu naquehén cuenda vaha yo chi ra cuan.

**Nu ndihí cahan ra Juan**

<sup>12</sup>Cuaha xaan ca tuhun tyái cuhva sacote chi ndo, soco ña cuñí sacote chi ndo chihin tutu. Soco nyatí cuhin nu nyicú ndo. Tyicuan ta ndatuhun vaha maa yo, tacuhva cusii ca cuñi yo.

<sup>13</sup>Ihya vachi nocumi chuun sahá sehe cuhun. Nacachi tucu Nyoo chi maa ña ñandihí.